



ASSEMBLEA DI  
CORSICA



**1A SESSIONE ORDINARIA PÈ U 2017**

**RIUNIONE DI I 27 È 28 D'APRILE**

**N° 2017/O1/022**

**QUISTIONE ORALE SPOSTA DA Mma Mattéa CASALTA  
A nome di u Gruppù « FEMU A CORSICA »**

**OGETTU : U picculu Patrimoniu**

Signore è Sgiò Cunsiglieri esecutivi,

Durentu a nostra zitellina avemu tutti, o quasi cunnisciutu u piacè d'andà à circà l'acqua à a funtana, d'accumpagnà a nostra mammona à u lavatoghju, avemu tutti aspettatu i caccavelli davanti à u furnu in carrughju.

Era tandu u paese !

Da tandu, i forni, i lavatoghji sò quasi spariti, e funtane, quand'ellu ùn si n'hè scurdatu omu, sò sottu à i lamaghjoni è un correnu più.

Di a listessa manera, quelle chì eranu à rente à e strade di muntagna è chì eranu per l'omi è l'animali una necessità, particularmente in periodu di muntagnera , sò spessu state distrutte è e so petre arrubate.

Stu picculu patrimoniu, custituisce una mansa d'opere d'arte chì ricolanu pè a maiò parte à u XVIII<sup>u</sup> seculu, cadastratu à u Pianu Terrenu di u 1795, è qualchì volta più anzianu dinù, mereta d'esse rispettatu è mantenutu in statu bonu da esse tramandatu à e purleve.

Tandu, a popolazione ùn avia accessu à l'acqua currente. Sti punti d'acqua eranu intratenuti, eranu simbulu di vita.

Oghje l'acqua hè sempre indispensevule à a vita è sò cambiati i mezi per avè la. In conseguenza stu picculu patrimoniu ne hà patutu.

Qualchì benevolente cum'è "L'ASSOCIU FIGHJULA I PETRI" prova, cun pochi mezi è una passione tamanta di ritruvà, pulì, salvà o puru rinnuvà ciò chì tandu era d'utilità publica, per testimugnà di u travagliu di i muratori è d'una storia : a nostra !

A sò ch'è vo site tutti, al di là di e vostre funzione attaccati à a nostra cultura è à e nostre tradizione.

Vi dumanderaghju dunque, chì pulitica prevedite di mette in ballu pè salvà ciò chì pò esse salvatu è chì mezi, materiali è finenziarii, puderiete impiegà per aiutà l'associ chì opereghjanu nantu à u terrenu ?